

新鑄古今事物原始全書

新鐫古今事物原始全書卷之四

明臨安徐炬明夫著

仁和張樸仲明校

爵

公侯伯子男謂之五爵唐虞斬五瑞修五玉是五等
自舜始也禮含文嘉曰殷爵三等周五等

封建

公羊曰黃帝分州畫野得百里之國萬區唐虞列為
五等此封建之始也帝王世紀曰炎帝之世有諸侯
風沙氏史記曰神農氏世衰諸侯相侵則炎帝時已

有諸侯至黃帝始大封也陸士衡五等論畧曰五等之制始於黃唐謂黃帝唐堯也

實封

通典曰唐封公侯無國土其加實封者則食其所封戶分食諸郡以租庸調給而已汾草曰魏黃初問樂自關內侯不食邑但虛封而已故唐因之加實封宋朝會要曰唐制食實封者戶給纁帛每賜爵遞加一級唐末及五代始有特加邑戶而罷實封之給今位為虛名也

戶封

晉書地理志曰古者有分土無分民若乃以戶口為升降畧封疆之遠近所謂分民自漢始也蓋漢興亡秦大侯不過萬家小者五六百戶則封國之以戶自漢始矣

諸侯

帝王世紀曰女媧氏時未有諸侯有共工氏任智刑以強伯而不王炎帝時始有諸侯夙沙氏叛炎帝脩德夙沙之民自攻其君則建侯分土自炎帝始也

諸侯王

古者天子稱王周失其道春秋之時吳楚之君始僭

稱之楚世家曰周夷王時楚熊渠曰我蠻夷也乃立
長子康為句亶王後熊通僭號為楚武王此諸侯稱
王之始也七雄爭強而齊魏韓趙燕齊亦各稱之秦
始皇稱皇帝除王之名漢戒楚始謂之諸侯王也

郡王

事始云後魏封功臣為郡王晉宗室傳云太康九年
封子邁為隋郡王始庶姓功臣得封郡王自後魏始
國公郡公

周有三公坐而論道未聞稱國公也按事始曰隋文
帝封功臣為國公之始而郡公之稱自漢光武建武

十三年以土無二王爵不過公以太原王章為齊公
魯王興為魯公功臣皆曰公侯為晉始曰開國郡公
百官

崔實正論曰太昊之世設九庖之官後有龍瑞以龍
紀官至唐虞建官惟百故歷代稱百官焉然則設官
自太昊始矣

品秩

自太昊以龍紀官唐虞建官惟百品秩未分按周官
以九儀正邦國自一命至九命漢時自中二千石止
二百石止魏文帝延康元年陳群立九品官人之法

至北齊而九品有正從之分而品秩之原肇於魏陳
辟焉

世廕

尚書大禹謨曰皋陶稱舜之德曰賞延於世則世廕
之始起於有虞氏

章服

唐車服志曰唐高祖令三品以上飾以金五品以上
飾以銀開元時中書令張嘉正奏致仕官佩魚終身
自是賞緋紫者必以魚謂之服章隋朝儀志曰大業
元年煬帝詔牛洪宇文愷等創造章服差等五品以

上通著紫袍大品以下燕用緋綠胥吏以青庶人以
白屠商以皂士卒以黃而唐書馬周傳云三品服紫
四五品朱六七品綠八九品青自馬周始也

循資

唐選舉志曰開元十八年裴光庭始作循資格而賢
愚一槩必與格合乃得銓授限年躋級不得踰越於
今為制

致仕

尚書曰伊尹既復政厥辟告歸誦云告老致政事於
君此臣下致仕之初也至周始有大夫士計致仕之

禮其事自伊尹始

太宰

周禮天官太宰以八則治都鄙以九職任萬民以九兩繫邦國之民以九貢致邦國之用以九賦斂財賄以九式節財用鄭元曰太宰統六官不主一官之事六官各能一官不兼群職也

三公三孤

夏商以前未聞有公孤之稱至周始立太師太傅太保惟茲三公論道經邦燮理陰陽少師少傅少保曰三孤貳公私化寅亮天地弼于一人呂祖謙曰三公

無職而六卿有職三公坐而論道而六卿行道也我
朝稽古定制革前代中書省倣六典立六部而公孤
之職間以六卿兼之亦成周之意也

太尉

漢百官表曰太尉秦官也掌武事者應劭以為周官
非也按河圖錄運法曰堯與太尉舜觀鳳凰則太
尉已見于堯時矣

侯伯

唐虞內有百揆四岳外有州牧侯伯之始我
朝內設六部即虞廷之九官外設十三布政司即虞

世之十二牧名不同而所理之事一地有異而分牧
之意同禮記天子使大夫為三監監於方伯之國蓋
方伯權重則易專大夫位卑則不敢肆是大小相
內外相統之意我
朝十三布政使司每歲監察御史巡其地焉蓋得法
人之意與

相

軒轅人紀帝始舉風后為相管子曰黃帝得六相而
天下治

丞相

商鞅定分篇曰秦孝公問法令於鞅鞅有丞相置一
法官之語則丞相之設始於秦孝公時

相國

荀悅漢紀云相國秦官也始皇尊呂不韋為相國之
始漢初以蕭何為之伏觀

皇明祖訓曰自古三公論道六卿分職並不魯設立
丞相自秦置丞相漢唐宋因之其間多有**人專權**
亂政罷丞相設五府六部都通大等衙門分理天下
庶務彼此頡頏不敢相壓皆朝廷總之所以穩當我
聖祖高見遠慮超出百王之上矣

宰相

周公位冢宰正百工以相成王故有宰相之稱漢言宰相上佐天子是也

平章

史記云唐有中書門下平章事為宰相之任唐百官志曰李靖以疾辭平章政事名官宜自此始

閣老

唐百官志曰中書舍人六人以久次者一人為閣老判本省雜事一人知制誥疑閣老之名自唐始

冢宰

周禮天官冢宰掌邦治統百官均四海即今之吏部

司徒

管子曰黃帝得祝融於南方使為司徒之始少昊以
鴈鳩氏為司徒舜命契為司徒周禮立地官為司徒
即今之戶部其屬有遂人蹇其野之土有太府受其
貨賄之入即內府頒其貨有於受用之府即外府有
司會乃計財之官有司書乃掌土地之圖有廩人倉
人掌粟入之藏有職內以會其入有職歲以會其出
有職幣以會其餘又有司會以總之司書以掌之或
以分其財守或以取其財用我

朝戶部內則兼總十三司外則又有戶部分司焉

宗伯

周官立春官宗伯掌邦禮治神人和上下唐虞謂之秩宗即今之禮部以嘉禮親萬民以飲食之禮親宗族兄弟以昏冠之禮親成男女以賓射之禮親故舊朋友以饗燕之禮親四方之賓客以脤膾之禮親兄弟之國以慶賀之禮親異姓之國其屬又有少宗伯小宗伯之分焉

司馬

周立夏官司馬掌邦政統六師平邦國即今之兵部

按國之大事在我宋以樞密院與中書省並用之謂之兩府我

朝設兵部以掌兵政而統軍旅專征伐則歸之五軍都督府焉兵部有出兵之令而無征伐之權五軍有統兵之權而無出兵之令彼此相維內外相制法制之善可垂萬世

司寇

周立秋官司寇掌邦禁詰奸慝刑暴亂即今之刑部周禮卽士師之職其屬有司刑掌五刑之法有掌囚掌守盜賊有職金掌受士之金罰貨罰有司圜掌收

教罷民凡害人者弗使冠飾而加明刑焉

司空

按史記司空古官也黃帝得屠龍氏于東方始有土師之始即司空也少昊以鴈鳩氏為司空舜典曰伯益作司空至周始以司空為冬官掌邦土居四民時地利而專掌度地居民量地制邑焉其屬有西人為甲弓人為弓矢人為矢柅氏為劍廬人為廬

太師

國語云虞官也商時箕子為之事始曰周文王得呂望于磻溪以為師故曰太師

太傅

通典曰成王時畢公為之按大戴禮曰周公始為之

太保

通典曰商時伊尹始為之文王世子曰虞有師保是也

六曹

漢成帝初置尚書四人分四曹一曰常侍曹主公卿事二曰二千石曹主郡國二千石事三曰民曹主吏民上言事四曰客曹主外國夷狄事按後百官志云世祖分二千石曹又分客曹為南主客曹北主客曹

凡六曹

吏部

漢初曰常侍曹後漢名選部魏始名曰吏部按左傳
晉文公作執秩以正其官注云執秩官名乃主爵之
官其屬有司封職林曰唐龍朔二年始置司封有司
無周禮夏官司馬之屬有司勳掌賞地之法後周吏
部有司勳上士又有考功周禮有考功記魏初亦置
考功亦唐虞考績之事也魏時又有中正陳群立九
品官人之法州郡皆置中正以定其選而以本處人
區別人物定為九等吏部憑之授受及其弊也惟據

惟據閥閱不分賢愚劉毅云下品無高門上品無寒士歷晉南北朝及隋選舉之法皆用之至開皇中方罷我

朝吏部設左右侍郎司務文選司考功司驗封司稽勲司並設郎中員外郎主事分理天下庶務焉

戶部

周禮地官之職漢置尚書四人一王財帛委輸即今之戶部吳時始有戶部之名漢屬有度支通典曰漢張蒼善筭以諸侯主計領裕國上計即度支之任也魏文帝始置度支尚書唐以為子司有金部即周官

職金掌錫石丹青之令是金部之任也魏世始置尚書金部郎有倉部周官倉人主藏九穀廩人主其數調賜稍食則倉部之職也魏時尚書始置倉部郎我朝戶部尚書設左右侍郎司務照磨檢校而十三司並設郎中員外主事分理天下庶務焉

禮部

唐虞謂之秩宗周為春官宗伯皆禮部之任也後周有禮部不言職事隋以典儀曹其名命自宇文周始也其屬有祠部魏始于尚書置祠部曹歷代因之有主客漢成帝初置尚書客曹光武分置南主客主于

此遂以名曹有膳部即周官膳夫也晉有左右士曹
北齊曰膳部我

朝禮部尚書設左右侍郎司務及儀制司主客司精
膳司並設郎中員外主事分理天下庶務焉

兵部

周禮夏官之職魏時有五兵尚書晉宋為七兵後周
始名兵部亦稱駕部唐置兵部一人侍郎二人掌武
選地圖車馬甲械之政有職方周官有職方氏掌天
下九州之圖隋初有職方侍郎通典曰後周依周官
亦有職方焉有駕部即周官輿司馬校人牧師巾車

之職皆駕部之事也魏百之代尚書始置駕部卽有庫部周官司甲掌戈盾弓矢則今庫部也魏尚書始有庫部卽也我

朝兵部尚書設左右侍郎司務武選司職方司車駕司武庫司並設卽中員外王事分理天下庶事焉

刑部

周禮秋官之職爲司寇乃刑部也漢光武時謂之賊曹後周始有刑部大夫自宇文周始也漢司隸之屬有都官從事掌中都官不法事此名官之初也光武改成帝二千石曹掌中都官水火盜賊魏青龍二年

始置尚書都官郎佐督軍事有比部魏時尚書有比部曹通典曰北齊比部掌檢勾事有司門周禮有司門之官通典曰後周官有司門隋初為司門侍郎煬帝除侍字也我

朝刑部尚書左右侍郎司務照磨檢校司獄又有十三道並設郎中員外主事分理天下庶事焉

工部

唐虞謂之共工周禮冬官之職漢制謂之民曹光武改為主繕修作池苑魏為左民晉為水部又為起部郎晉山簡能詩杜子美詩云遷客不妨員外置詩人

列作水曹郎而何遜張籍並有詩名俱為水部後周
始為工部有屯田漢昭帝始置屯田而成帝置尚書
郎一人主戶口墾田此尚書屯田之始也魏代為農
部晉始有屯田尚書則屯田名曹在晉世也有虞部
舜命益作虞周禮有虞衡之官蓋虞部設官之本魏
始置虞曹郎後周改曰虞部有水部周禮夏官有司
陰掌溝塗蓋水部之職也魏尚書始有水部郎我
朝工部尚書設左右侍郎司務及營繕虞衡都水屯
田之四司並設郎中員外主事分理天下庶務焉按
六部尚書起於秦時遣吏四人在殿中主發書故謂

之尚書晉志曰漢光武始分尚書為六曹續事始曰尚主也出納王命敷奏萬機政令所由宣選舉所由定罪賞所由正焉唐武后以吏部為天官戶部為地官禮部為春官兵部為夏官刑部為秋官工部為冬官宋初以吏兵禮戶刑工為次至神宗因唐故事仍以吏戶禮兵刑工為次漢制尚書郎主作文書起草五日一美食下天子一等

僕射

漢武帝建始元年初置尚書五人一人為僕射唐宋皆有之高士廉與祖父三世為右僕射

侍郎

漢制尚書郎三歲則稱侍君郎隋煬帝於尚書六曹各制侍郎一人然則侍君郎之稱始于漢六部各置一侍郎則始于隋

郎中

秦有郎中令漢時尚書初稱守郎中唐時號正郎徐堅初學記曰唐武德三年尚書郎改為郎中唐時禮部郎中謂之儀曹

員外

隋開皇三年尚書分六曹列二十四司各置員外郎

一人自隋文帝始也按漢書惠帝即位賜爵員外郎則隋置員外亦取漢故事耳禮部員外郎號瑞錦窠

都御史

唐制御史大夫一人

今左中丞二人

今左右

其屬有三院

今併其二于察院

一曰臺院侍御史隸焉二曰殿院中侍御史

隸焉三曰察院監察御史隸焉大事奏裁小事專達

凡有彈劾御史以白大夫今設都御史職專糾劾百司辨明冤枉提督各道其屬有十三道分掌各布政司事其京衛并直隸府衛則分隸焉實

朝廷耳目之任所以振肅紀綱而防邪革弊然六部

之職各有所司而察院惟所見聞雖不繫職司皆以糾察焉唐武后以法制群下許陳官御史得以風聞言事後世臺諫聞風言事始自武氏宋人遂按焉故事今

制有都察院左右都御史左右副都左右僉都又總制都御史十總督都御史八巡撫都史五十三道坐道御史十三道巡按監察御史南北直隸御史

御史

周禮御史掌國都鄙及萬民之治以贊冢宰御史之職在周如此戰國時秦趙會緝池各命御史書鼓瑟

擊缶之事則皆記事之職也秦漢以來始為糾察之任其所居之署漢時為之御史府亦謂之御史大夫寺亦謂之憲臺謂之御史臺亦謂之蘭臺寺隋及唐皆曰御史臺又按通典曰御史之名周官有之蓋掌贊書而授法令非今任也周之柱下史即漢時以張蒼為御史主柱下文書是也至漢始有侍御史之名漢武帝時始有綉衣侍御史秦始皇以御史監理諸郡始謂之監察御史隋開皇三年亦置監察御史唐宋因之按唐時監察御史一察官民善惡二察戶口流散賦役不均三察農桑不勤倉廩耗減四察奸猾

盜賊不事生業五察茂異六察黠吏豪家兼併縱暴
出百官志今

制分天下為十三布政司歲遣監察御史巡其地唐
穆宗時宮中百花開放以重頂帳蒙蔽之因置惜花
御史實乃風霜之任彈糾不法百僚震恐官之雄峻
莫之比焉故宋制御史入臺滿十旬無章疏者有辱
臺之罰

監司

漢初遣御史監三府郡察詞訟其後復置監察御史
唐分天下為十道置巡察使尋改按察使後又改採

坊處置使其戎旅之地即置節度使宋初置轉運使
後又置提點刑獄凡四司曰帥曰漕即轉運使曰憲
即提刑曰倉各自建臺每司各有長官掾佐按黃帝
四監唐虞四岳十二牧三代方伯連帥是皆漢世監
司之職秦漢以來始立郡縣置守令地分而官衆兼
之者官無常制治無定署有監察之名無刺舉之實
國初循勝國之制設行中書省既而罷之分天下十
三布政使司設布政叅政叅議各二員皆分左右總
一方承流宣化之任又設按察司以司憲度設都指
揮使司以掌軍政謂之三司每年遣御史一員以巡

授其地臨邊則專命大臣以鎮壓有事則分遣大臣以巡撫是以官無曠職民無宿寃

通政

舜典帝曰龍朕詒說殄行震驚朕師命汝作納言夙夜出納朕命惟允按虞世之納言即今通政司之職我

太祖高秉正為通政使諭之曰壅蔽於言者禍亂之萌專恣于事者權姦之漸故必有喉舌之司以通上下之情以達天下之政昔者虞之納言周之內史漢之尚書唐之門下省皆其職也官以通政為名政猶

水也欲其常通無壅遏之患其審命令以正百司達
幽隱以通庶務當執奏者勿避忌當駁正者勿阿隨
當敷陳者毋隱蔽當引見者毋留難毋巧言以取容
毋苛察以邀功毋讒間以欺罔公清亮直以處厥心
庶不負委任之意我

朝通政司政使左右通政左右叅議經歷知事分理
天下庶務焉

九卿

禮記曰夏后時始置九卿周以冢宰司徒宗伯司馬
司寇司空為六卿儀禮疏云諸侯兼官司徒兼冢宰

司馬蕪春官司空蕪秋官漢制十二卿其正卿九人
曰太常光祿衛尉太僕鴻臚宗正少府司農晉百官
志古者諸侯皆名執政大臣曰正卿周之後始有三
公九卿之號梁時以司農為春卿唐曰司稼又曰稼
卿光祿為飽卿鴻臚為睡卿太常少卿為清卿按周
禮每卿六十屬六卿三百六十屬六卿所分之屬在
唐分為二十四司今
制禮吏工兵各部四司而戶部刑部各十三司深得
周官六典之遺意也

大理

春秋元命包曰堯為天子得臯陶聘為大理之始舜時為士師韓詩外傳晉文公使李離為火理劉向新序曰楚平王以五奢為大理而大理之名自古有之秦時為廷尉漢初因之至景帝中元間改廷尉為大理蓋復古也孟詵錦帶前書曰三代法官之名曰士師曰廷尉曰大理名異而官同古司寇聽政于棘木之下故稱大理之官曰大棘九棘者孤卿位焉植棘者取其赤心而外刺也

評事

漢宣帝地節三年初置廷尉左右評魏晉時無左右

字且曰評隋煬帝時始名曰評事

司直

晉武帝咸寧中置大理寺丞魏晉時置大理寺主簿
後魏永安二年高穆奏置大理司直按漢武時有丞
相司直淮南子曰湯有司直之人鄭風曰邦之司直
然則司直之官其來尚矣

太常

周禮春官之職秦為奉常漢景帝始改為太常周禮
司常掌九旗之物是也漢為太常亦曰太常丞而太
常簿亦漢官也魏文帝初置太常博士我

朝太常寺設卿少卿寺丞博士典簿之官焉

光祿

漢書曰秦為郎中掌宮殿掖門之事漢武帝太初元年改名光祿勳梁時除勳字改曰光祿卿續事始曰秦設此官掌宮殿之事魏晉以來有左右光祿及光祿大夫重者加以金章紫綬因稱金紫光祿大夫漢世光祿大夫銀印青綬故號銀青光祿大夫周禮天官膳夫上士二人中士四人下士八人府二人史四人胥十有二人徒伯有二十人掌王之食飲膳羞以養王及后世子按膳夫即今光祿寺官膳夫乃食官

之長自膳夫以下庖人內饗享人等官皆以士為之
屬于冢宰漢時置光祿簿丞秦置大官令即周官膳
夫庖人外饗之任魏分太官為尚食知御膳太官掌
百官之饌我

朝光祿寺卿少卿寺丞典簿錄事珍璫署良醢署掌
醢署各設署正署丞監事之職分理焉

鴻臚

周官大行也漢書曰秦為典客掌諸侯四方歸義蠻
夷漢始改曰大鴻臚徐堅云漢改之漢百官表曰太
初元年更也梁時除大字應劭曰鴻臚臚傳之也傳

聲贊道也唐因陳隋之舊有鴻臚主簿一人隋時有鴻臚寺丞我

朝鴻臚寺卿少卿寺丞主簿又設司儀署司賓署鳴贊序班之官焉

太僕

書景命注云太僕者掌王命之官也三代時已有之周禮太僕掌正王之服色出入王之大命掌諸侯之服迎王胝朝則前正位而退入亦如之按太僕之官在周為侍御之長所掌者乃胝朝之事其屬有鼓人敕日月則詔王鼓亦太僕所掌秦漢時有太僕寺丞

梁有太僕主簿唐初命太僕張萬歲葺其馬政僅得
牡牝二千匹自貞觀至麟德四十年馬七十萬餘匹
後世則以典牧馬之政焉

苑馬寺

晉時謂之馬曹亦曰騎曹養馬之官名曰奚官坡詩
老髯奚官騎且順國初都金陵設太僕寺于滁州後
定都于北又設太僕寺于京師凡兩淮及江南山東
河南每府州縣添設佐貳官一員專管馬政在外設
行太僕寺於山西陝西遼東凡三處苑馬寺亦三處
陝西甘肅各轄六監二十四苑遼東僅一監二苑內

地則民牧以給京師之用外地則官牧以給邊方之用又于川陝立茶馬司五以茶易番戎之馬亦為邊計也按事始云晉時謂之騎曹亦曰馬曹即今之苑馬寺周禮馬質掌質馬平其價馬量三物一日戎馬二日田馬三日駑馬校人掌王馬之政辨六馬之屬一種馬二戎馬三齊馬四道馬五田馬六駑馬凡頒良馬而養乘之乘馬四匹曰乘一師四圉三乘為皐皐一趣馬三皐為繫繫一馭夫六繫為廐廐一僕夫六廐成校校有左右駑馬三良馬之數

天子有十二閑馬六種邦國六閑馬四種家四閑馬

二種牧師掌牧地皆有厲禁而頒之孟春焚牧

除陳草生新草

中春通淫掌其政令庾人掌十二閑之政圉師掌教圉人養馬春除蓐爨廐始牧夏序馬冬獻馬

內外閑廐使

唐開元時始命王毛仲為內外閑廐使牧養有法本朝有御馬監掌

天子十二閑之政以供乘輿之用其牧養之地則有鄭村等草場其飼餼之卒則有騰驤等四衛

監國史

唐百官志曰貞觀以後多以宰相監修國史遂成故

事其制始于唐

翰林

周禮內史掌王之八柄之法以詔王治凡命諸侯及孤卿大夫則策命之吳澂曰內史者即翰林之職猶今學士院之草制誥也然謂之史者乃掌文書贊治之名今併史館于翰林亦此意也我

太祖之吳元年置翰林院以陶安為翰林學士洪武十八年始定翰林官制而革承旨直學士待制應奉之名設學士二員講讀學士各一員有侍講侍讀五經博士典籍侍書待詔外此又設修撰編修檢討等

官皆屬之翰林馬夫學士者代言之官也講讀者經筵之職也五經博士典籍即前代秘書之屬也侍書待詔則前代供奉之名所謂史官者則前代著作起居之任也永樂

太宗以內閣知制誥備顧問

仁宗又于本官上加以卿佐師保任用猶重歷任既久又易本官以文淵閣等大學士云按三代以前未聞有翰林之設至唐太宗每召名儒草制待詔常于北門候候號北門學士唐明皇改為翰林之始已而改為供奉開元二十六年乃為翰林之始宋時翰林

學士掌內制凡制誥赦勅國書及宮禁所用之文辭
凡后妃親王公主宰相除拜則草詞赦降德音則進
草乘輿行幸則侍從以備顧問有所獻納則講對或
奏對故翰林謂之內制中書謂之外制其後混雜謂
之兩制又按歷代學士之名漢世未聞至晉陶淵明
雖有學士祖企謝景夷之稱而晉制不言其官亦未
聞也實始于唐明皇二十六年明矣又按南史宋謝
超宗傳曰齊受禪高宗令撰郊廟歌有聰明學士劉
融等北齊有文林館學士周有麟趾殿學士唐初齊
王元吉有學林館學士貞觀初開文學館以房玄齡

等十八人為學士倦遊錄云學士以上有一朱衣引馬帶用黃金而無魚入府則朱衣双引金帶懸魚謂之重金詩云眼前何日赤腰下幾時黃是也

侍講

唐職官志云漢以來未聞有侍講之稱至漢明帝張酺每侍講于御前靈帝時楊賜劉寬俱侍講于華光殿雖有侍講之名而未以名官至唐玄宗開元十三年始置侍講之始宋真宗咸平間以國子監祭酒邢昺為侍講學士之始

侍讀

按唐玄宗開元三年勅選耆儒博碩每日一人侍讀不拘一官後召馬懷素褚無量更日入直而侍讀宋真宗咸平二年以楊徽之夏侯嶠為侍讀學士之始並出史記

大學士

唐書李泌傳泌加集賢殿大學士之始

脩撰

唐制史館脩撰掌脩國史按脩撰之名始此又有北門脩撰集賢殿脩撰古文殿脩撰皆史官也宋時置會要以纂修國史又置修國史同修國史修撰同脩

撰編修官檢討官按修撰檢討專以修史為事始見
宋時前此大抵專以修經武要畧為職屬於樞密院
名雖同而實則異夫百官所任乃一時之事史官所
任乃萬世之事故周禮宰夫八則有史以贊治漢法
太史公位丞相之上凡天下計書先上太史公副上
丞相唐宋宰相皆兼史官其重有如此者自成周有
左右史漢有起居注唐宋之起居舍人及著作郎之
屬皆史官也我

朝開國之初猶設起居注後革之惟以修撰編修檢
討掌國史焉遇有纂修則以大臣為之監修學士為

之總裁其法制可謂簡而備矣

編修

吳處厚青箱雜記云宋太宗興國中以楊文舉為史館編脩之始

檢討

宋置監脩國史一人以宰相為之而脩撰直館檢討無常員以京官以上充之

著作郎

晉太和中始置著作郎隸中書元康中又隸秘書著作郎一人謂之大著作專掌史任晉康帝以武陵王

領秘書監以增重史事

總裁

元順帝修宋史以脫脫為都總裁以鐵木兒塔識及歐陽玄等為總裁然偏任國族不廣立賢之跡我高皇仁聖首以宋濂王禕為總裁徵山林之士汪克寬胡翰等一十六人為修元史之史官十四年定制以修撰編修檢討為史官我

朝翰林院設大學士侍講侍讀脩撰編脩檢討孔目庶給事焉

祭酒

六帖曰周成王以彤伯為祭酒以主親屬漢時於博士內擇聰明威重者一人為博士祭酒晉咸寧中初立國子學始置國子祭酒然則祭酒亦周官也

司業監丞

隋煬帝大業三年始于國子監置司業監丞之官

博士

班固云六國時往往有博士之稱漢百官表曰秦時置博士貫通古今晉武帝初立國子學始置國子博士通典曰漢武建元五年始置五經博士漢孝文欲廣游學之筵論語孝經孟子爾雅始謂之太學博士

按漢武始置五經博士蓋五經之在漢也有專門之學故當時各設博士以掌之不獨訓詁名義凡政事之有更張事體之有疑議而朝廷議論之際博士皆得與焉

助教

晉咸熙四年改國子學曰國子監始置助教以教生徒唐因之宋仁宗時胡瑗掌太學奏設太學正錄我朝因予監設祭酒司業繩愆廳監丞典簿典籍五經博士率性堂修道堂誠心堂正義堂崇志堂廣業堂並設助教學正學錄焉

太史

按史記帝乙立微子啓為太子而太史爭之則太史之官已見商時周禮太史達邦之六典又有外史掌四方之志三皇五帝之書漢朝圖籍所在有石渠石室廣延閣貯之于外府又有御史居殿中掌蘭臺秘書及麒麟天祿二閣藏之于內禁後漢圖書在東觀

秘書監

漢桓帝延熹二年始置秘書監一人掌典圖書考合同異齊職儀曰漢獻帝始置秘書丞通典曰後漢馮融為秘書郎掌審定讐圖書之始唐制秘書省掌經

籍圖書之事秘書郎掌四部圖籍校書郎掌先典籍
刊正文章唐開元二年始置集賢校理太宗端拱元
年始置秘閣校理宋有秘書監掌古今經籍圖書國
史實錄天文曆數之事有少監監丞有著作郎秘書
郎校書正字各以其職隸于長貳我

朝圖籍皆藏于內閣所設之官止一典籍焉

中書舍人

百官志曰漢官也武帝時呂文顯為中書舍人勢傾
天下魏置中書周時掌宮中之事唐中書省中書令
三人掌化天子執大政總判省事後改曰西臺又改

中書省曰紫薇省中書令曰紫薇令舍人曰紫薇郎
因白樂天有紫薇花對紫薇郎之句我

朝華中書省而設六部尚書侍郎而中書專以書寫
為職耳

太子賓客

賓客之名群書無載按漢高祖欲易太子呂后用張
良計迎四皓以定太子賓客之名疑始于此漢文帝
為太子立思賢苑以招賓客孝武為太子立博望苑
使通賓客唐高宗顯慶元年以于志寧等為太子賓
客

唐事

秦官也歷代因之應劭曰唐給也為給事于禁庭也漢景帝以竇嬰為唐事宣帝以孔霸為太平唐事唐時始置唐事府置少唐一以佐唐事

洗馬

晉時有洗馬江統曰戎狄亂華宜早絕其原乃作徙戎論此洗馬名官之始

諭德

秦漢以來未聞有諭德之官至唐高宗龍朔三年置太子左右諭德之始

庶子

禮記燕儀曰周天子之官有庶子周禮夏官司馬之屬謂之諸子秦置中庶子詹事員漢因之晉以為東宮官隋時分左右按漢時有太子庶子魏有太子中庶子則非晉以為東宮官也

中允

宋大中祥符九年以馮元為太子中允直龍圖閣此稱中允之始我

朝詹事府設太詹少詹主簿錄士左春坊左右庶子左右諭德左右贊善左右司直郎左右清紀郎校書

左右司諫正字司經局洗馬通事舍人

諫議大夫

周禮保氏掌諫王惡秦始皇置諫議大夫掌議論無
常員漢武帝更置諫大夫光武又以為諫議大夫唐
置左右補闕左右拾遺宋改左右司諫左右正言是
異名而同事也

給事中

秦始皇置給事中漢因之後漢有給事黃門侍郎左右
給事中之始隋初改為給事郎唐武德三年改為給
事中定為四員注云以其事殿中故曰給事中也唐

時給事中也得以封駁詔書注云封者封還詔書而
不行駁者駁正詔書之所失

太醫院

周禮天官冢宰之屬有醫師上士下士掌醫之政令
聚毒藥以供醫事凡邦之有疾病者疾瘍者則使醫
分而治之歲終則稽其醫事以制其食疾醫掌萬民
之疾病四時皆有癘疾以五味五穀五藥養其病以
五氣五聲五色眡其生死瘍醫凡療瘍以五毒攻之
以五氣養之以五藥療之按周禮醫師即今太醫院
之職疾醫今之內科也瘍醫今之外科也秦置太醫

宋神宗置醫局以曉醫事者一人判局事唐會要曰
唐正觀三年俱府州並置醫學博士又置醫學助教
我

朝內設太醫院使院判御醫吏目外府州縣並設醫
學馬

欽天監

堯典曰乃命羲和欽若昊天曆象日月星辰授人
時周禮馮相氏掌十有二歲十有二月十有二辰十
日二十有八星之位辨其敘事以會天位保章氏掌
天星以志星辰日月之變動以觀天下之遷辨其吉

凶以星土辨九州之地所封封域皆有分星以觀妖祥陶唐以前占步之法未祥是帝堯命羲和紀數以書有一定之曆觀天以器有一定之制故成周之馮相保章世其官以專其業按歷代掌曆數之官少昊時以鳳鳥氏為曆正堯以羲和掌曆數夏后氏謂之太史周曰馮相保章秦曰太史令唐乾元元年改為司天監掌天文曆象風雲氣色其小史有靈臺郎保章正然則少昊之曆正堯之羲和夏后氏之太史周之馮相保章秦之太史令唐之司天監靈臺郎實名異而職同我

聖祖改前代司天臺為欽天監設監正監副主簿及天文生深得帝堯欽若昊天之意矣

黜陟使

德宗遣黜陟使庾何等十一人行天下陸贄說使者請以五術省風俗八計聽吏治三科登儻又四賦經財寶六德保罷察五要簡官事五術曰聽諍訟審其哀樂納市價觀其好惡訊簿書考其諍訟覽車服視其奢侈儉省作業察其趣舍八計曰計戶口豐耗以稽撫字視怨田盈縮以稽本末視賦役厚薄以稽廉冒視案籍繁簡以稽聽斷視囚繫盈虛以稽決滯視姦

盜有無以稽禁禦視選學衆寡以稽風化視學校興廢以稽教導三科曰茂異賢良幹蠱四賦曰閔稼以奠稅度產以差征料丁壯以計庸占商賈以均利六德曰敬老慈幼救疾恤孤賑貧窮任失業五要曰廢兵之冗食蠲法之撓人省官之不急去物之無用羅事之非要

府尹

周成王之命曰尹茲東土楚有令尹蓋尹之始也漢京兆河南曰尹唐以州郡建府者皆曰尹宋朝有開封府尹臨安尹

治中

秦置郡丞以佐守漢因之又設治中別駕主叅曹之文書隋煬帝罷之置贊治唐昭宗改為治中然治中別駕自漢始而治中自唐始

經制使

宋官也徽宗末陳亨伯兼經制使移用諸司則計而以經制為名紹興初孟庾又因經制之額增枌而為經總制錢至光宗時趙汝愚言諸州措置月椿錢其間名色類多違法害民有曰麪引錢納醋錢賣紙錢戶長甲貼錢保正牌限錢拆納牛皮筋角錢兩訟不

勝者則有罰錢既勝令納歡喜錢殊名異目在處非
一此是經總制月椿錢

大行人

周禮大行人掌大賓之禮及大客之儀以親諸侯春
朝諸侯而面天下之事秋覲以訖邦國之功夏宗以
陳天下之謨冬遇以協諸侯之慮時會以發四方之
禁殷同以施天下之政時聘以結諸侯之好殷頻以
除邦國之慝間問以諭諸侯之志歸賑以交諸侯之
福賀慶以贊諸侯之喜致禴以補諸侯之裁朝覲宗
遇會同六者諸侯之覲于王者也間問歸賑賀慶致

禮四者天子致愛于諸侯者也大行人以九儀辨諸侯之命等諸侯之爵以同邦國之禮而待其賓客上公之禮饗禮九獻食禮九舉諸侯之禮饗禮七獻食禮七舉諸伯如諸侯之禮子男饗禮五獻食禮五舉大行人十有二歲王巡狩殷國文中子叔恬曰舜一歲而巡五嶽國不廢而民不勞何也曰無他道也兵衛少而徵求寡也而小行人專謚號之職我朝行人司有司正司副行人焉

御厨

唐會要曰昭宗天祐元年四月勅設御厨司周有湯

官主餅餌導官主擇米今之御厨即周之湯官也王莽時主鑄錢者謂之鐘官藝文志云古之王者欲聞閭巷風俗故立稗官作小說及街談巷議謂之稗官小說漢武帝時交趾有橘官秩二百石土貢御橘

六尚

如淳曰一曰尚食掌天下之物曰尚秦置六尚乃有尚食則尚食秦官也

尚藥

梁陳以來皆為太醫兼職亦秦所置六尚之一也

尚醢

唐以前有尚乘無尚醢宋朝元豐中官制行則置此官也

尚衣

周有司服為禮官之屬戰國始有尚衣尚冠之職北齊制主衣隋復曰尚衣也左氏曰昔虞閼父為周陶正注云陶復陶也陶正主君上之衣服此尚衣之始也

尚舍

周禮天官有掌舍凡舍事則掌之漢官有守官舍于魏則殿中職也隋煬帝別置殿內監改舊殿中局曰

尚舍

尚輦

周官有巾車秦漢為車府令隋煬帝初置殿內省尚輦也

記室

漢書百官志曰王公及大將軍幕府皆有記室掌章表書記魏志魏太祖以陳琳阮瑀為記室然則記室漢官也

觀察

唐置觀察使又置採訪使續事始曰唐至德初改為

觀風置判官二人

叅軍

通典曰後漢末置叅諸軍府事其職同節度判官漢書靈帝以幽州刺史陶謙叅司空張溫軍事此其始也

錄事

漢司隸屬有功曹從事史兼錄衆事在州為治中漢有督郵主簿皆錄事之任也晉始置錄事叅軍續事始曰後漢有郡主簿亦曰督郵隋以錄事叅軍代之掌勾稽文簿舉彈善惡監牌印給紙筆之事

功曹

秦漢有功曹史蕭何為書史掾功曹是也後漢亦有功曹史主選功勞北齊為功曹叅軍今止開封府置餘州省也

倉曹

漢有倉曹史北齊以為叅軍今獨開封府置也

戶曹

漢公府有戶曹掾主民戶祀農桑等事北齊以功曹倉曹戶曹同為叅軍唐諸府曰戶曹餘州曰司戶

兵曹

漢公府掾史有兵曹主兵事司隸屬官有兵曹從事
今獨開封府置也

諸使

唐初功臣傳往往有內客省之語唐永泰間四方多
事于右臺門置客省以居之上書言事及蕃戎將吏
于此待報然未設官也唐昭宗天祐元年四月始置
客省使五代會要曰梁有引進使唐會要曰五代時
有內外馬步軍都頭漢有都引進使通典曰漢有客
曹亦曰大行令魏改客館令宋初置南北客館後周
置東西南北客館並未以使稱也至宋太宗始改曰

四方館使唐會要曰唐昭宗天祐元年始置閣門使
梁時亦有東西二上閣門使唐則天時分置園苑使
唐正元十四年吳奉奏置內園使五代會要曰梁時
置內園裁接使宋會要曰唐有作坊院掌金銀等物
者五代改為作坊使周有染人堂染帛秦為平準令
隋為司染署唐為染坊使宋太祖時教坊使衛德仁
求外官上曰用伶為刺史此莊宗失政豈可效之耶
宰相擬上州司馬上曰上佐乃士人所處資望甚優
亦不可輕授此輩但當于樂部中轉遷耳漢靈帝時
市價小民有相聚為宣陵孝子者數十人詔皆除太

子舍人唐高祖以舞胡安叱奴為散騎侍郎三朝用
之得失相去遠矣宋朝會要曰唐置諸使朝廷有
詔則云諸司諸使諛之唐書朱泚以李忠正為皇城
使唐有翰林使專掌伎術五代有翰林茶酒使宋時
茶床使梁有尚食使唐有營幕使梁開平初改為儀
鸞院使唐昭宗天祐元年置御厨使唐置十五道采
訪使唐有糴坊毯坊使又有酒坊使宋太平興國中
克平嶺南及交趾海南諸國入貢市人乘舶販易外
夷三佛齊勃泥占城犀象香藥之物充物府庫京師
置香藥權易院以張遜為香藥庫使通典曰隋置宮

苑總監掌苑內官館園池之事唐開元十九年以湯崇慶為五坊宮苑使宋朝會要曰唐有飛龍使及小馬坊使唐長興元年改飛龍院為左飛龍院小馬坊為右飛龍院太平興國中改為左右天厰雍熙二年始曰左右騏驎院使太平興國三年初置內藏庫使唐百官志曰開元十九年以監察御史一人監左藏庫後以殿中侍御史一人為左藏使我

朝分設甲乙丙丁戊己庚辛壬癸十庫以給事御史即中三官巡視庫藏焉

宮正

周禮天官之屬有官正掌王宮之戒令有官伯掌王宮之士庶子凡在版者有闕人掌守王宮之中門之禁喪服凶器不入宮潛服戎器不入宮竒怪民不入宮凡內人公器賓客無師則幾其出入以時啓閉按周立官伯掌王宮之士則是王朝宿衛之人皆公卿大夫士之子弟也本朝用功臣子弟以為勲衛蓋亦此意

世官

唐陸贄曰按命秩載于令甲者有職事官有散官有勲官有爵號其流有四惟職一官以序才能以位賢

德所謂施實利而寓之虛名也其三者所係止于服色資蔭而已以序崇貴以甄功勞所謂假虛名以佐實利也我

朝異姓無王惟公侯伯而無子男歲錫以祿而無唐宋食邑之虛名其中有等第焉有世官者則以軍功得官而子孫承襲世世不絕自指揮使以下至于鎮撫是也有流官者因其材能擢以任事則終其本身不得世襲在內則五軍都督府錦衣衛指揮在外則都指揮叅將遊擊等是也我

太祖賚天下致仕武臣諭之曰同立艱難致有今日

顧朕子孫保無窮之天下則爾子孫亦享無窮之爵祿一何仁之至也

掾

漢制曹公稱曰掾有決曹掾賊曹掾功府掾王太尉問阮千里曰老莊與聖教同異荅曰將無同大尉善之辟為掾號三字掾

漕運

管子曰粟行三百里國無一年之積粟行四百里國無二年之積粟行五百里則衆有飢色按晉荐飢乞糴于秦秦輸粟于晉自雍及絳相繼不絕名曰汎舟

之後自吳城邳溝通江淮是開渠以通糧也而漕運已見于春秋時後秦欽攻匈奴運糧使天下飛芻輓粟起于黃而抵瑯琊負海之郡轉輸北河蓋由海道以入河也然則海運已見于秦時唐玄宗擢韋堅為郊都太守水陸運使即今之備運也

刺史

漢武帝乾封五年既平胡越開北斥境以交趾朔方冀幽并兗徐青楊荆豫益涼等州凡十三部皆置刺史之始其制刺史以六條問事非條所問即不省一條強宗豪右田宅踰制以強凌弱以寡暴衆二條二

千石不奉詔書遵承典制倍公向私旁詔牟利侵漁
百姓聚歛為姦三條二千石不恤疑獄風厲殺人怒
則任刑喜則任賞煩擾剝暴戮黎元為百姓所疾
山崩石裂妖祥訛言四條二千石選署不平苟阿所
愛蔽賢寵頑五條二千石子弟怙恃榮勢請托所監
六條二千石違公下比阿附豪強通行貨賂割損政
令後改為州牧晉以來加持節後周加諸軍事唐武
德後加持節某州諸軍事某州刺史宋朝以他官知
州事而刺史不臨州以為武臣惟加俸而已

叅政

唐宰相有叅知政事唐會要曰武德元年以裴寂知政事正觀元年以杜淹叅議朝政叅議之名疑是此始我

朝承宣布政使司設左右布政左右叅政左右叅議經歷都事照磨檢校分理各府州之庶務焉

提刑

淳化元年詔諸路轉運司各命一人專知糾察刑獄公事景德四年詔擇官提點諸路刑獄公事提刑之官始此唐會要曰景龍二年置十道按察使分察天下

戶工分司

周禮歛人掌歛野之賦稅歛薪芻凡蔬材林材凡畜聚之物唐德宗時趙贊初稅天下竹木十取其一之始我

朝凡天下關津去處設抽分竹木屬而抽分客商與販竹木柴炭等物近年差戶工二部屬官親臨抽分

太守

漢時朝臣出使以駟馬為太守增一馬為五馬太守自漢始書云外有州牧侯伯即此任也秦罷侯郡置守尉監漢景帝更名太守唐武德元年改為刺史禮

云天子六馬左右驂三公九卿駟馬左驂漢制九卿
二千石得以右驂而太守駟馬而已其加秩二千石
者諸得右驂以五馬稱太守乃美名也漢時太守給
銅虎符異郡志云吳郡太守堂數被火焚塗以雄黃
故稱黃堂

守去声在宥韻守土守國之守
在有韻上声驂者駕三馬也

通判

宋太祖建隆四年命賈玘等充荆南諸州通判之始
按孫朴言通判古時監郡之職一州利害全藉議論
與僚屬不同乞朝廷選差通判與知州又按後漢置
別駕即通判之職也

別駕

唐六典曰後漢置別駕歷代皆有之通典曰從刺史行部別乘一乘副車故謂之別駕漢制也

推官

舊唐書云天寶以後置推官之始唐百官志曰節察防團使皆有推官

長史

漢百官表曰秦置郡丞其郡當邊戍者丞為長史宜秦所置官也通典曰唐有五府長史理府事餘府州通判而已

知州

唐代宗大曆十二年勅刺史有故乃闕但置知州事
知州之名始此

州牧

書曰惟作天牧又曰以倡九牧舜典咨有十二牧然
舜時外州牧侯伯自唐虞始也

督郵

白帖云州主簿郡督郵並今錄事叅軍陶淵明懶折
腰于郡督郵安喜縣張飛鞭督郵其官亦漢官也

運副

開元中裴耀卿為江淮轉運使以崔希隆為副此置
運副之始也

運判

宋朝會要曰開寶五年以潘美領嶺南轉運使使許
允為判官是轉運之有判此其始也太平興國三年
置諸道轉運判官

縣令

周官有縣正下大夫商君列傳曰軼令邑聚為縣置
令丞則縣令及丞自秦孝公始也縣令長皆秦官萬
戶以上為令萬戶以下為長宋會要曰周衰六國置

縣邑其長齊晉曰大夫魯衛曰宰楚曰公曰尹秦曰令曰長

知縣

唐會要曰大中五年以裴讓權知縣事蓋知縣之名始起于此宋朝會要曰建隆四年六月詔河朔右地魏為大名府分治劇邑當用能吏特選士于朝斷自朕心以重其任用大理正奚嶼知大名府館陶縣事監察御史王祐知魏縣朝臣知縣是嶼等始也

縣丞

史記商君傳曰鞅令邑聚為縣置令丞縣丞宋會要

文華卷四
四
曰天聖四年詔開封兩縣各置丞一人在簿尉之上
此置丞之初也

主簿

百官志漢晉時皆有主簿唐亦縣置二人他縣置一
人掌縣之簿書凡民租之版出納之會符檄之要訟
獄之成勾其事之稽違與其材之得失以贊令治後
漢仇覽為主簿晉時謝安景仁為主簿即今錄事叅
軍也

巡捕官

宋哲宗時歐陽修言禦盜四事一曰州縣置兵為備

二曰選捕盜之官三曰明賞罰之法四曰去冗官用良吏以撫疲民使不起為盜宋時捕盜官名巡邏令尉按周禮有野廬氏掌達國道跽若有賓客則令守塗地之人聚橐之有相翔者誅之然則巡捕之名始于宋而周之野廬氏名異而官同也橐與折同即今

市舶司

漢官也自漢通南越而始設官未有市舶之名以市兼舶為名則始于宋焉元因宋制每歲招集舶商于蕃邦博易珠翠香貨等物我

朝市舶司之名雖沿其舊而無抽分之法惟于閩浙

廣三處置司以待海外諸蕃之進貢者蓋用以懷柔
遠人實無所利其入也出南部新書

檢校

唐書高祖紀武德六年四月以楊恭仁檢校梁州諸
軍事疑檢校之官自此始也

教授

唐武德初府郡並置經學博士掌以五經教授德宗
即位改為文學宋神宗于諸大郡府各置教授一人
掌教導諸生今之教諭訓導之官其義始此

都水使者

舜命益作虞蓋掌山澤之官川衡澤虞即都水之任也秦始有都水長丞漢武元鼎二年初置水衡都尉其後因都水官多復置左右使者此蓋設官之始也晉武帝省水衡置都水使者自此官名乃定春有都水丞漢又有水衡丞晉除水衡置都水丞晉初又有都水主簿

河舶所

漢宣帝時耿壽昌白增海租蕭望之言縣官掌自漁故海魚不出後復與民漁而魚出馬後世魚課始此我

朝凡有河船之處皆立官以考魚課歲有定額惟浙
廣最多

批驗茶引所

按三代及秦未聞有茶稅也漢張滂請初稅茶每十
稅一唐世回紇貢以馬易茶至宋始置茶馬司元世
祖置權茶都轉運司我

朝革前代權務貼射交納種名色捐茶利于民惟于
四川陝西置茶馬司關津要害置批驗茶引所官
事物原始卷五終

事物原始卷五終

新鐫古今事物原始全書歷朝武職卷四

明臨安徐炬明夫采輯

仁和張檉仲明校正

將

黃帝本紀帝舉力牧為將之始天子遣將而親操斧持頭授將軍以柄曰間以外將軍裁之

將軍

周禮天子六軍一萬二千五百人為一軍其將皆命卿在國稱大夫在軍稱將軍漢時有輕車將軍張光弼詩云收拾全吳還聖主將軍須用李輕車李廣為

驍騎將軍周制王六軍大國三軍次國二軍小國一軍

大將軍

戰國時始有大將軍之號楚懷王與秦戰虜其大將軍屈平項羽稱范增為大將軍隋煬帝諸衛各置大將軍

上將軍

史記漢始以呂祿為上將軍魏文帝黃初中有上將軍之號唐哲宗貞元元年各置上將軍於各衛老子曰君子用兵則貴右是以偏將軍居左上將軍居

右由是觀之則古時已有上將軍之名矣

元帥

左傳云楚子及諸侯圍宋宋公孫固如晉告急咨于衆誰可當中軍元帥之任趙襄對曰卻縠可然則元帥已始于春秋時

都督

漢光武時初權置督軍御史魏文帝黃初三年初置都督諸軍事曹操以夏侯惇為都督之始至魏明帝太和四年始加司馬懿為大都督

幕府

漢書云衛青克匈奴拜大將軍于幕中故曰幕府之名始此顏師古曰謂之幕府蓋軍出居止無常張幕遮之故也按史記廉頗李牧為將皆入幕府漢文帝問馮唐唐對上功幕府之說則上將之稱幕府其來尚矣

上柱國

史記云上柱國楚之寵官也楚懷王使柱國昭陽攻齊陳軫問曰楚國何官貴昭陽曰上柱國是也後魏孝莊始立柱國大將軍後周建德四年又增置上柱國大將軍隋置上柱國然柱國之官以酬其勲勞實

不理事故唐以為勲官

留守

唐制軍馬不在京則置留守唐李晦為西京留守裴度為東都留守之始

總管

晉時有都軍事後周始改為總管以統軍唐高宗用三大總管擊高麗

大司馬

史記漢成帝以元舅平陽侯王鳳為大司馬註云即太尉公也一人掌四方兵事功課歲畢則奏其殿最

而行賞罰成帝陽朔三年王鳳薨以王音為大司馬
成帝永始二年王音薨以王商為大司馬成帝元祐
元年王商薨以弟王根為大司馬成帝綏和元年王
根薦莽自代以王莽為大司馬

樞密

西晉泰始中王景文為中書令兼管內樞密此其名
之始也宋志云樞密院佐天子執兵政凡邊防軍旅
之常務與三省分班稟奏事干國體則宰相執政官
合奏我

朝革樞密設五軍都督府分掌軍旅而兵權無獨專

之患而樞密之權一歸于兵部焉

駙馬都尉

漢武帝元鼎二年初置駙馬駙馬正駕車者皆為副馬一日附近也疾也凡尚公主者必拜駙馬都尉者自魏晉以來蓋以王姬之重庶姓之輕若不加級何以合沓漢制以列侯尚而主公魏何晏始以主壻拜後代循用為常制是何晏始也

防禦

武后聖曆元年以夏州領防禦使祿山犯順當衝諸郡皆置之防禦之官是則天始也唐書志曰至德後

中原大郡要害之地置防禦使不賜節鉞

團練

肅宗乾元元年始置團練使馮鑑曰至德中觀風使并領都團練蓋唐官也

經畧

唐太宗正觀中遼州別置經畧使咸平四年以張齊賢為經源安撫兼經畧蓋唐官也

宣撫

新唐書云德宗詔蕭復充山南江湖等道宣撫安慰使之始

安撫

唐正觀初遣大使巡天下諸州水旱則有安撫之名高宗時命裴行儉冊波斯王始為安撫大使武后命狄仁傑為河北道安撫蓋其始也

破虜將軍

漢武帝元封元年帝出長安登單于臺三年始遣趙破虜將軍擊樓煩

驃騎車騎將軍

按府兵之制起于西魏後周而備于隋唐興因之武德初始制軍府以驃騎車騎兩將軍領之

輕車將軍

漢武帝始置輕車將軍始以公孫賀為之又置輕車校尉唐採其名置上輕車都尉及輕車都尉

驃騎將軍

漢武帝元狩二年始命霍去病為驃騎將軍擊匈奴之始

都指揮使司

按吐蕃即西蕃其地北起陝西之河隍迤南歷四川抵雲南西北之境洪武六年始立都指揮使司者二烏思藏朵甘是也指揮使司者一荅衛是也

指揮同知

本朝洪武二十二年征敗北胡來降者衆詔以兀良哈之地置泰寧朵顏福餘三衛以處之為東北之外藩命其長為指揮使指揮同知各領其部

護軍

秦有護軍都尉漢以陳平為護軍中尉盡統諸將歷代為將領之任焉唐書云正觀十七年改上大將軍為上護軍大將軍為護軍也

都護

漢武帝內屬者三十六國置使者校尉領護宣帝改

曰都護唐征高麗拔平壤置安東都護府

先鋒

孫子曰軍先選鋒周宣王之北伐六月之詩曰元戎
主來以先鋒先行自宣王時始在軍之前曰啓軍之
後曰殿軍行在前者所謂選鋒也

司馬

曲禮云天子之五官有司馬本行都之職任武之官
古者軍行則有之唐高祖即位改治中為司馬節度
使有行軍司馬

都尉

漢宮也諺云爛羊頭關內侯爛羊胃騎都尉後魏泰
王幹從太宗出遊二箭下双鵬號射鵬都尉

金吾

漢初為式道武帝更名金吾其職掌檄巡京師持麾
至宮門門始開漢百官志金吾仗則置犛牛于槩首
注云犛牛即幫牛也能抵觸百獸

羽林

漢之衛名掌王之隨從初名建章營騎後更名羽林
騎至武帝取天南有星名曰羽林之義始稱為羽林
衛從軍死事者之子孫養之羽林號羽林孤兒

虎賁

周官執王之射御者曰虎賁蓋侍御僕從中近臣之
長也故夏官之屬有虎賁氏掌先後王而趨以卒伍
軍旅會同亦如之舍則守王閑王在國則守王宮國
有大故則守王門大喪亦如之勇而疾走曰虎賁又損
怒也天子之觀兵也按
今之錦衣以下十二衛專以扈從宿衛為職也

旅賁

周官有旅賁掌執戈盾夾王車而趨左八人右八人
車止則持輪凡祭祀會同賓客則服而趨喪紀則衰
葛執戈盾軍旅則介而趨注云旅賁者言
有臂力之稱也按周官既有

虎賁又有臂賁亦猶今制錦衣之卒既有校尉又有將軍力士也

千牛

宋謝綽拾遺記千牛衛乃人主防身者取莊子庖丁解千牛之義後魏有千牛備身御刀唐顯慶五年置左右千牛府龍朔三年始改府曰衛宋柴宗慶為千牛衛將軍

騎都尉

漢武帝元鼎二年始置騎都尉初以李陵為之唐採漢故事置上騎都尉與騎都尉

步兵校尉

漢武帝因秦火書即建藏書之策置寫書之官下及諸子傳說皆充秘府至成帝使謁者陳農求遺書于天下使劉向校諸經傳諸子詩賦又使步兵校尉任宏校兵書

司兵

周官司兵掌五兵五盾各辨其物與其等以待軍事及授兵從司馬之法以頒之五兵者戈矛戟酋矛夷矛也五盾者干櫓之屬

諸尉

百官志云尉秦官也漢高帝以周勃為太尉誅呂氏
漢張釋之為廷尉漢趙過為搜粟都尉時語曰爛羊
胃騎都尉李膺為司隸校尉漢長安四尉分左右部
黃綬大冠唐時尉稱少府漢雍仲進南海香拜洛陽
尉唐有叅軍簿尉有罪輒遭責辱杜詩云脫身簿尉
中始與捶楚薛曹操為洛陽尉造五色榛京師歛迹
婁師德牛僧孺孟郊柳宗元裴景升趙元亮薛緘皆
授尉漢元帝置戍已校尉屯田以耕土為事即今屯
田官也

衛宮衛尉

漢制南軍設衛宮衛尉以主之設護京中尉以王北軍而南軍有郎衛兵衛之別而諸郎羽林期門皆郎衛也如衛士衛侯令丞皆兵衛也我

朝設錦衣旗手等十二衛親軍指揮使司即漢之南軍衛宮之意立中左右前後五軍都督府即漢北軍衛京之意

虞候

春秋時有候正主斥候虞候之名始此唐宋時亦設此官名同而職異

伏飛

漢百官表曰乃少府官屬秦有左戈漢武帝太初六年更名欽飛注曰勇力之官也今大駕鹵簿亦設虞候欽飛二官

軍民指揮使司

周禮職方氏掌天下之圖以掌天下之地辨其邦國都鄙四夷八蠻七閩九貉五戎六狄之人民與其財用九穀六畜之數要知其利害王制曰中國夷狄五方之民皆有性也不可推移東方曰夷被髮文身有不火食者南方曰蠻雕題交趾有不火食者西方曰戎被衣皮有不粒食者北方曰狄衣羽毛穴居有不

粒食者按古之夷狄見于經者始于三苗今巴蜀以東歷湖南北桂嶺雲貴數千里溪崗山菁之中曰玃曰狔曰獠曰獠曰獠之類凡十數種皆蠻也其間最輕捷者曰猫即三苗之後也

國初于湖北川東立宣慰司者五曰永順曰保靖曰貴州曰播州曰思州又有宣撫司安撫司及招討司長官司之設外此所謂軍民府及軍民指揮使司又兼設土官以轄其夷人元憲宗始于河州置吐蕃宣慰司都元帥府又于四川徼外置各宣撫司

宣慰使司

宋熙寧朝大理國遣使貢方物封其首為大理國王
元憲宗平大理立為三十七郡世祖自西蕃入大理
平雲南遂分三十六路

本朝洪武十七年立為蠻川車里二宣慰使司又有
孟養木邦緬甸老撾八百大甸宣慰司

四尉

唐百官志曰武德間定令改隋上大都督為驍騎尉
大都督為飛騎尉帥都督為雲騎尉都督為武騎尉
萬戶府

唐神哲高宗朝始于河州置吐蕃宣慰司又始于四

川徵外置各宣撫司我

朝洪武七年置宣慰司者三招討司者六萬戶府者
四千戶所者十有七此皆在化外之境歲通朝貢而
已

府兵

其事起自西魏後周備于隋唐因之總曰折衝府凡
天下十道置六百三十四而關內二百六十一凡府
三等千二百人為上千人為中八百人為下民年二
十為兵六十而免

禁軍

宋兵制有三天子之衛兵以守京師備征戍曰禁軍諸州之鎮兵以給役使曰廂軍選于戶籍或應募使之團結訓練以為所在防守名曰鄉兵

本朝設錦衣等十二衛以衛宮禁無所隸屬又設留守等四十八衛以衛京城分隸五軍都督府遇有征行則調發之今天下都指揮使司凡十六處而為行都司者四又湖廣添一行都司為五內外衛軍士太率以五千六百名為一衛一千一百十二名為一千戶所一百一十二名為一百戶所每一百戶內總旗二名小旗十名管領鈐束以戍隊伍此軍伍之制未

常因元之舊也唐有南北衙兵南衙諸衛兵是也北衙禁軍是也唐高祖初起兵有元從禁軍太宗置百騎武后改為千騎睿宗增至萬騎肅宗有供奉射生之官代宗以後有左右神策軍其十六衛曰左右衛曰左右驍騎衛曰左右武衛曰左右威衛曰左右金吾曰左右領軍曰左右監門曰左右千牛自左右至領軍並掌宮禁宿衛金吾掌宮中京城巡警監門掌諸門禁衛千牛掌侍衛按

本朝十二衛即唐人十二衛之遺制凡諸衛之親軍直宿衛執戈戟嚴巡警監門禁而錦衣所掌者乃鹵

簿儀仗之事旗手所司者乃旗纛金鼓之物諸衛皆
統軍卒而錦衣獨領校尉而力士即周之虎賁督賁
也諸軍皆世卒而府軍獨僉幼軍即漢之六郡良家
子也其諸衛正倅一惟其世獨錦衣之任則不以世
而以能蓋天子御座則夾陛而立天子御輦則扶轅
而行出警而入蹕承旨而傳宣皆在所司也

女將

李淵女李氏適柴紹亦將精兵萬餘會李世民于渭
北號娘子軍女將始此

事物原始卷四終

事物原始卷四終